

# Ils Rumantschs da Sargans chantan gugent

■ (anr/vi) L'Uniun rumantscha da Sargans e conturn dumbra 100 commembers, 30 dad els chantan en il Chor mixt rumantsch. Il president *Venanzi Casanova* po esser cuntent cun il svilup da sia uniun. Mintg'onn spluntan intgins interessents a sia porta per entrar en l'uniun. Magari avess *Casanova* era gugent, sch'i entrass dapli giuventetgna, ma questa auta finamira na cuntanschan era autras uniuns betg.

«Dals commembers activs domineschan momentan ils Sursilvans», constattescha *Casanova*. Quai saja deplorabel. En las statutas hajan els era ina prescripziun che minimum in suprastant stoppia esser d'ordaiifer la Surselva. Per il mument na saja quai dentant betg realisabel. En mintga cas sajan era Ladins, Surmirans e glied da Schons bainvegnids.

## Il chor

Il dirigent dal chor è *Eugen Casanova*. Da preschent exerciteschan ils chantadurs per la festa da chant a Mels che ha lieu ils 15 da zercladur. Là vulan els passar si cun la chanzun «Desideri» dal cumponist *Gion Balzer Casanova*, scritta da *Gion Deplazes*.

Il chor chanta era gugent per ses giubilars. Quest onn p. ex. ha il president d'onur *Anton Flury* festivà ses 90avel an-



Viagiar è ina da las activitads da l'Uniun rumantscha da Sargans e conturn.

MAD

niversari. El aveva presidià l'uniun 26 onns fin il 1991. Perquai ha l'uniun gratulà ad el cun intginas chanzuns.

## Visitar l'opera a Vaduz

Quest onn han ils Rumantschs laschà crudar la saira culinara. Persuenter stat

ina visita a l'opera a Vaduz «Zar und Zimmermann» sin il program. Dus commembers da l'uniun chantan num-

nadamain en il chor da l'opera. Il settember è la «Emna da Bogn Ragaz». Là ha l'uniun mintg'onn ses stan da spezialitads. I vegn vendì capuns, maluns e pettas che las cuschinunzas da l'uniun han fatg. Ils capuns e maluns vegnan vendids en purziuns, ma na per consumar a la fiera, mabain per prender e mangiar a chasa.

## Ils chaus en la suprastanza

A la fin da l'onn vegn sa chapescha era il San Niclà tar ils Rumantschs da Sargans e conturn. La festa da San Niclà ha adina lieu en l'ustaria Bergheim. Lezza vegn manada d'ina commembra.

Schizunt commembers che n'abiteschan betg pli en la regiun da Sargans e ch'èn «turnads ensi» sa participeschan gugent a las pitschnas festas.

*Fidelia Staub* è stada ils ultims onns la vicepresidenta da l'uniun. Per la fin da l'onn passà ha ella demissionà, deplorescha *Casanova*. La suprastanza sa constituescha uss sco suonda: La nova vicepresidenta è *Mathilda Kobler*, cassiera fa *Imelda Friberg*. Il dirigent *Eugen Casanova* ha anc l'uffizi d'actuar e *Walter Berther* e *Rochus Cadruvi* èn assessurs.

**Interessents pon sa drizzar a Venanzi Casanova, Sarganserstr. 45, 8887 Mels. Telefon: 081 723 41 31.**